

Īsā^(a.s) Kī Maut Par Qudrat**Iñjeel : Yuhannā 11:1-57**

Laazras naam kā ek ādmī thā jo beemaar thā. Wo Baitaaniyah naam ke ek qasbe me apnī do bahanoṇ ke saath rahtā thā jinkā naam Maryam aur Maarthā thā.⁽¹⁾ Wo Maryam hī thī jinhone Īsā^(a.s) ke pairoṇ par itr kī botal uñdel dī thī aur phir unke pairoṇ ko apne baalon se saaf kiyā thā. Maryam kā bhaaī beemaar thā⁽²⁾ islie unhone ek ādmī ko Īsā^(a.s) ke paas bhej kar kahalawaayā, “Āp kā accħā dost beemaar hai.”⁽³⁾

Jab Īsā^(a.s) ne ye baat sunī to kahā, “Is beemaarī se uskī ziñdagī Ḳhatm naheeñ hogī. Is se Allaah taa’alā kī azmat zaahir hogī jo uskī aur uske chune hue numaiñde ke liye izzat le kar āī hai.”⁽⁴⁾ Īsā^(a.s) Laazras, Maarthā, aur Maryam se pyaar karte the.⁽⁵⁾ Jab unhone Laazras kī beemaarī ke baare me sunā to wo jahaan the wahaañ do din aur zyaadā ruk gae.⁽⁶⁾ Tab Īsā^(a.s) ne apne shaagirdoṇ se kahā, “Chalo, ham Yahudiyā waapas chalte haiñ.” [Jahaan Baitaaniyah naam kā qasbā thā.]⁽⁷⁾ Shaagirdoṇ ne kahā, “Lekin ustaad, wahaañ Yahudiyoṇ ne hamen pattharoṇ se maarne kī koshish karī thī. Ye abhī thođe waqt pahale kī baat hai aur ab āp chaahte haiñ ki ham wahaañ phir se jaaeñ?”⁽⁸⁾ Īsā^(a.s) ne jawaab diyā, “Kyā din me baarah ghañte naheeñ hote haiñ? Agar koī din ke ujaale me chalegā to wo ḥagmagaayegā naheeñ, kyuñki wo duniyā kī roshnī me sab kuch dekh saktā hai.⁽⁹⁾ Lekin agar koī raat me chaltā hai to wo gir jaatā hai kyuñki usko raastā dikhaane ke liye roshnī naheeñ hai.”⁽¹⁰⁾

Īsā^(a.s) ne is sab ke baad ye kahā, “Hamaarā dost Laazras so gayā hai. Lekin maiñ wahaañ jā kar usko neeñ se ut̄haauñgā.”⁽¹¹⁾ Shaagirdoṇ ne kahā, “Lekin janaab, agar wo so jaaegā to tañdarust ho jaaegā.”⁽¹²⁾ Īsā^(a.s) ke kahne kā matlab thā ki Laazras maut kī neeñ me so chukā hai. Lekin Īsā^(a.s) ke shaagirdoṇ ko lagā ki wo sach me so rahā hai.⁽¹³⁾ Tab Īsā^(a.s) ne binā kisī pareshaanī se kahā, “Laazras mar gayā hai.⁽¹⁴⁾ Maiñ tumhaare liye Ḳhush huñ ki maiñ wahaañ maujud naheeñ thā taaki tum yaqeen karo. Chalo, ab ham uske paas chalte haiñ.”⁽¹⁵⁾ Tab Thomā (jisko Didymus bhī kahte the) ne dusre shaagirdoṇ se kahā, “Chalo, ham bhī chalte haiñ, taaki ham uske saath mar sakeñ.”⁽¹⁶⁾

Īsā^(a.s) jab Baitaaniyah pahuñche to unheñ patā chalā ki Laazras chaar din pahale hī mar chukā hai. Usko qabr me dafnā diyā gayā thā.⁽¹⁷⁾ Baitaaniyah Yerushalam se do meel kī durī par thā.⁽¹⁸⁾ Bahut saare Yahudī log Yerushalam se Maarthā aur Maryam ko pursā dene āe the.⁽¹⁹⁾ Jab Maarthā ne Īsā^(a.s) ke āne kī Ḳhabar sunī, to wo unse milne ke liye chal pađi lekin Maryam ghar par hī rukī rahī.⁽²⁰⁾ Maarthā ne Īsā^(a.s) se kahā, “Sarkaar, agar āp yahaan pahale ā jaate, to merā bhaaī naheeñ martā.⁽²¹⁾ Maiñ ye bhī jaantī huñ ki āp Allaah rabbul azeem se jo bhī maañgeñge wo āpko zarur milegā.”⁽²²⁾

Īsā^(a.s) ne kahā, “Tumhaarā bhaaī ziñdā hogā aur phir se jiegā.”⁽²³⁾ Maarthā ne jawaab diyā, “Maiñ jaantī huñ ki wo qayaamat ke din phir se ziñdā ho jaaegā.”⁽²⁴⁾ Īsā^(a.s) ne usse kahā, “Maiñ logoṇ ko maut se ziñdā karne waalā huñ, aur maiñ hī jaan huñ. Mujh par īmaan rakhne waalā agar mar bhī jaae to bhī ziñdā ho jaatā hai.”⁽²⁵⁾ Aur jo ziñdā hai aur mujh par īmaan bhī rakhtā hai to wo kabhī naheeñ martā. Maarthā, kyā tum is baat par īmaan rakhtī ho?”⁽²⁶⁾ Maarthā ne jawaab diyā, “Jī huzur, maiñ is baat par īmaan rakhtī huñ ki āp Maseehā haiñ, Allaah rabbul azeem ke pyaare numaiñde, jo is duniyā me āe haiñ.”⁽²⁷⁾

Maarthā ye sab kahne ke baad, apne ghar waapas chalī gaī aur usne apnī bahan Maryam ko chupchaap saarī baaten batā deeñ. Maarthā ne kahā, “Hamaare rahanumā yahaan ā gae haiñ aur wo tumheñ bulā rahe haiñ.”⁽²⁸⁾ Jab Maryam ne ye baateñ suneeñ to jaldī se uñh kar Īsā^(a.s) se milne chal pađi.⁽²⁹⁾ Īsā^(a.s) tab tak shahar ke añdar naheeñ gae the aur abhī usī jagah par hī the jahaan Maarthā unse milne āi thī.⁽³⁰⁾ Yahudī log Maryam ko pursā dene āe the aur jab unhone Maryam ko uñh kar jaate hue dekhā to wo bhī uske peeche-peechē chal pađe. Unko lagā ki Maryam qabr par rone ke liye jā rahī hai.⁽³¹⁾ Lekin, Maryam us jagah gaī jahaan Īsā^(a.s) the aur unko dekh kar unke qadmoṇ me gir gaī. Wo bolī, “Huzur, agar āp yahaan hote, to merā bhaaī naheeñ martā.”⁽³²⁾ Īsā^(a.s) ne dekhā ki Maryam ro rahī hai aur uske saath āe Yahudī bhī ro rahe haiñ. Īsā^(a.s) ko ye dekh kar bahut afsos huā aur wo bahut pareshaan hue.⁽³³⁾ Unhone puchā, “Tumne use kahaan dafan kiyā hai.” Unhone kahā, “Āie aur dekhie, huzur.”⁽³⁴⁾ Īsā^(a.s) bhī ro pađe. [a]⁽³⁵⁾ Unko rotā dekh kar Yahudī āpas me bole, “Dekho ye usse kitnī zyaadā mohabbat karte haiñ.”⁽³⁶⁾ Lekin kuch logoṇ ne ye bhī kahā, “Agar ye ādmī añdhe logoṇ ko āñkhoṇ kī roshnī de saktā hai, to phir use marne se kyuñ naheeñ bachaayā?”⁽³⁷⁾

Ye sun kar Īsā^(a.s) ko bahut afsos huā. Wo qabr ke paas gae jo ek gufā me thī jiskā muñh ek patthar se bañd thā.⁽³⁸⁾ Īsā^(a.s) ne kahā, “Is patthar ko hañao.” Us mare hue bhaaī kī bahan, Maarthā, ne kahā, “Lekin huzur, usko mare hue chaar din ho chuke haiñ aur añdar bahut zyaadā badbu hogī.”⁽³⁹⁾ Tab Īsā^(a.s) ne usse kahā, “Kyā maine tumko

naheeñ bataayā thā ki agar tum īmaan rakhtī ho to tum Allaah rabbul kareem kī taaqat dekhogī?”⁽⁴⁰⁾

To un logoñ ne gufā kā darwaazā khol diyā. Īsā^(a.s) ne dekhā aur kahā, “E, paalanahaar, maiñ terā shukr adā kartā huñ ki tune merī duā ko sun liyā.⁽⁴¹⁾ Maiñ jaantā huñ ki tu mujhe har waqt suntā hai. Lekin mere ās-paas log khađe haiñ. Maiñ ye islie kah rahā huñ taaki unko yaqeen ho jaae ki tune hī mujhe bhejā hai.”⁽⁴²⁾ Īsā^(a.s) ne, ye sab kahne ke baad, ek tez āwaaz me cheekh kar pukaarā, “Laazras, baahar āo!”⁽⁴³⁾ Ye sunte hī wo baahar nikal āyā aur uske jism par kafan ke tukđe abhī bhī bañdhe hue the. Īsā^(a.s) ne logoñ se kahā, “Iske jism se kafan utaaro aur ise jaane do.”⁽⁴⁴⁾

Wahaan par bahut saare Yahudī the jo Maryam se milne āe the. Unmeñ se bahut saare logoñ ne jab Īsā^(a.s) kī is qudrat ko dekhā to wo un par īmaan le āe.⁽⁴⁵⁾ Lekin, kuch log Fareesiyoñ ke paas mukhbirī karne chale gae aur Īsā^(a.s) ke us karishme ke baare me bataayā.⁽⁴⁶⁾ Bađe imaam aur Fareesiyoñ ne Yahudī rahanumaaon ko milne ke liye bulaayā. Unhone āpas me mashwarā karā, “Ham sab kyā karen? Ye ādmī bahut karishme dikhā rahā hai.⁽⁴⁷⁾ Agar ham ne isko naheeñ rokā to har koñ us par īmaan le āegā. Tab Romī log yahaan ā kar hamaare haath se hamaarī ibaadatgaah aur hamaarī qaum leñge.”⁽⁴⁸⁾ Wahaan par ek ādmī maujud thā jiskā naam Kaaifā thā. Wo us saal kā sabse bađā imaam thā. Kaaifā ne kahā, “Tum log kuch naheeñ jaante ho!⁽⁴⁹⁾ Ye accħā hai ki ek ādmī logoñ ke liye mar jaae to purī qaum tabaah hone se bach jaaegī.”⁽⁵⁰⁾

Kaaifā, anjaane me Īsā^(a.s) ke qurbaan hone kī peshangoñ kar rahā thā aur kah rahā thā ki wo saare logoñ ke liye qurbaanī deñge.⁽⁵¹⁾ Allaah taa’alā ye sab sirf Yahudiyoñ ke liye naheeñ balki duniyā bhar me phaile apne bandon ko ek saath jamā karne ke liye kar rahā thā.

Yahudī log Īsā^(a.s) ko qatl karne kā mañsubā banaane lage.⁽⁵³⁾ Isī wajah se Īsā^(a.s) ne unke beech me befikrī se safar karnā cħođ diyā. Wo us jagah ko cħođ kar Ifraaem naam ke ek shahar me chale gae jo registaan ke paas thā aur waheeñ apne shaagirdoñ ke saath rahne lage.⁽⁵⁴⁾

Yahudiyoñ kī fasah kī eid^[b] kā waqt kareeb āyā. Eid se pahale bahut saare log Yerushalam chale gae the. Wahaan unhone apne āpko paak karne ke liye rasmeñ purī kareen.⁽⁵⁵⁾ Log Īsā^(a.s) ko dhuñgh rahe the. Wo ibaadatgaah me ek dusre se puch̄ rahe the, “Tumheñ kyā lagtā hai? Kyā wo is jashn me āeñge yā naheeñ?”⁽⁵⁶⁾

Imaam aur Fareesī logoñ ne Īsā^(a.s) ko qaid karne kā hukm jaarī kar diyā thā. Unhone logoñ se kahā thā ki wo unheñ bataaeñ ki Īsā^(a.s) kahaan haiñ, taaki unko giraftaar kiyā jā sake.⁽⁵⁷⁾

[a] Īsā^(a.s) kā ronā jhut-muth kā naheeñ thā, iskī do saaf wajah haiñ:

- Unke chaahne waaloñ ko un par yaqeen naheeñ thā ki wo maut par qudrat rakhte haiñ.
- Kyuñki sab ke rone se unkā dil bhī bhar āyā thā.

[b] Musā^(a.s) ke daur me Allaah taa’alā ke hukm se is jashn ko manaane kī shuruaat huī thī. Is eid ko tab se manaayā jā rahā hai jab se Misr me maut kā farishtā Ibraaniyoñ ke gharoñ ke upar se nikal gayā thā aur unke bete zindā bach gae the.